



彭瑞珠 女士

客家語 / 現代詩類 / 社會組

得獎作品 /

企在若窗門背

【得獎感言】

讀書，係為著愛曉得享受生活。

阿姑婆，您得獎哩！

您个身影，化做詩句，記錄在教育部个語文成果網。

企在若窗門背

遠遠 影著

若屋後背个杌仔樹 又打吔
樹身飄過屋頂哩 直拚向天
樹尾該三粒杌仔 企做一排
浸青个色水 在十一月个風中 自在
油臘个葉面 在臨暗个紅霞肚 晟光

該杌仔樹像你 像
還係細人仔个你 像
後生時節个你 乜像
老咧 樂線个你

風做風摠啊 樹做樹搖
軟韌个樹身 隨在風
硬程个杌仔 享受光
你講 拗命毋贏
該就 禍福由命

該杌仔樹下 有你
在滿天个紅霞肚 有你
該 嘍雞仔轉竇个 聲哨
該 七層塔燴吊菜仔个 香氣
該 一勺一勺盤等燒水个 身影
還在該 有紅霞箭等个 灶下裡肚

偈 企在若窗門背 看往入
尋毋著 在灶下坐寮个 你
影毋真 屋肚消散等个 紅霞
看毋出去 後尾門外背个 樹下
淨看著 頭擺
你 種个兩頭杌仔樹 該樹尾還浸青